

四庫全書

集部

欽定四庫全書

無為集卷七

宋 楊傑 撰

絕句

廬山五笑

并序

無為子願遊廬山者二十年矣治平三年冬赴官江西
舟過匯澤乃得侍親攜幼按奇尋勝以償素望一宿山
間而去馬上不覺自笑願一已無足笑故廣之而成廬
山五笑云

遠師

我笑東林寺孤高遠法師種蓮招社客平地鑿成池

陶淵明

我笑陶彭澤聞鐘暗皺眉籃輿急回去已是出山遲

陸先生

我笑陸簡寂修真脫世埃九霄一飛去重入舊山來

開先招老

我笑開先老家風雙劍高雲間本無事拭目看金毛

無為子

我笑無為子遊山學古人
匡廬不能住騎馬入紅塵

贊皇公祠

夢到瀛洲夜覺來江上秋
一身投絕域千古弔窮愁

魏徵君草堂

召伯甘棠國東郊處士家
百年三世隱泉石當生涯

登南樓

此樓此景他州無山川形勢吞三吳
唯憑詩老寫奇勝

縱有畫筆難工夫

此樓此景他州無攔干倚遍還躊躇
主人有酒且共醉驪歌不用催行車

此樓此景他州無天高水濶連平蕪
綠楊深處杏花發日暖數聲山鷓鴣

懷黃梅三閣

并序

黃梅縣牆西有池多魚舊政或捕為樂
自余為令戒勿取其後乃為放生池
池上三閣曰釣閣吟閣醉閣公暇

與客登之頗有佳趣因葛令赴官作三章寫其懷云

釣閣

屏去竿頭餌非唯用直鉤我來魚不避魚信我無求

吟閣

二十年前令曾來閣上吟如今頭已白詩有壯時心

醉閣

江邊醉長官昔慕陶彭澤未賦歸去來於今有慚色

題陳令壁

地勝江山國風清
令尹家酒闌寒食
夜月上海棠花

清軒

清軒直下壓秦淮
淮是秦皇厭勝開
千古興亡無問處
好風唯共月明來

水月軒

湛碧一泓泉中涵
千古月不比天上
輪三五有盈缺

徐賢亭偶成

湖外青山在湖邊
人不歸古今無問
處幽鳥下漁磯

遥碧亭

幽鳥無心去又還
迢迢湖水出東關
暮雲留戀不飛動
添得一重山外山

斗野亭

八月風高浪渺瀾
僊公醉倚海槎枝
夜深曾傍亭邊過
亭上主人知不知

送陳令歸無為

楚水漾輕碧
楚花飛亂紅
故人故鄉去
半雨半晴中

劉彥輔乞侍養

變化未隨雷煥劍晨昏願服老萊衣
山堂大飲不敢醉應恐倚門人望歸

別安廷老

山色淺深煙靄裏客情去住別離中
臨川聚會應不久明日扁舟乘便風

和黃侔別諸公

二首

豫溪春雨江湖平蒼壁洲邊春草生
吏民出郭自歸去

草間流水隨君行

垂楊陰裏繫行舟
隔岸數聲黃栗留
異日相逢定何處
莫辭春蟻一杯浮

釣磯懷古十章

并序

治平三年冬十月一日艤舟江上與二三子登古釣磯
慨然長望有客問曰古之善釣者可得聞歟曰呂望任
公子詹何魯人莊周琴高陵陽子明嚴光左慈劉遺民
皆古之善釣者也呂望釣魚磻溪有志於天下也任公

子釣於會稽以大取其大也詹何釣於南國以寡獲其
多也魯人釣於洙泗華過其實也莊周釣於濮靜而保
真自適也琴高釣於涇仙而隱也子明釣於旋溪愛物
而有獲也嚴光釣於東陽退而自適也左慈釣於魏樂
其術也遺民釣於江東知時也十子之釣或取或捨或
進或退所適不同同歸於釣唯至神為能以不同同之
以不釣釣之使各任其所適焉夫有志於天下者可與
共治以大取大者可與議遠以寡獲多者可與議要華

過其實者可與救質保真自適者可與救貪知時者可與議變愛物者可與議取仙者術者可與遊乎方外故物物各遂其性人人各盡其材來者納而勿拒往者縱而勿追得者吾得之失者我亦得之然後出入六合遊詠乎太和之域非天下之至神其孰能與於此哉乘風將行乃賦釣磯懷古十章云

呂望

舉世無人用直釣直釣到底是良謀孟津再擲磻溪餌

八百諸侯盡愛周

任公子

機深誰及任公子
淞水蒼梧飽巨鱗
鯢鮓不吞釣上牂
一年笑殺海邊人

詹何

五年南國釣煙波
妙手從來所得多
魚引盈車竿不撓
幾人施舍似詹何

魯人

好釣無如魯國人暗投香桂餌遊鱗誰知淺水魚貪食
不待金鈎翡翠綸

莊周

謾投香餌試纖鱗楚使徒來濮水濱莫訝持竿不相顧
顧君還是上鈎人

琴高

不釣浮名不釣魚一綸鈎線卷還舒九霄控鯉無人識
誰道纖鱗是膾餘

陵陽子明

旋溪不殺真龍子學道三年躡太虛今古報恩人亦有
不知誰有腹中書

左慈

香餌輕投一席間鱸魚潑潑躍銅盤曹公不悟神仙術
徒整金鈎把釣竿

嚴光

狂奴肯顧安車聘祇愛東陽七里灘誰道世間人不識

客星光射紫微寒

劉遺民

雨笠煙蓑細草巾持竿誰識白蓮人當時若得文王獵
涇水還應似渭濱

寶林院五松

葛洪井上兩三株不與孤秦作大夫借問東山歲寒木
得毋羞見水西無

太白桃花潭

李白詩云太白登舟方欲行忽聞
江上踏歌聲桃花潭水深千丈未

若汪倫
送我情

桃花潭似武陵溪
太白仙舟去欲迷
岸上踏歌人不見
年年空有鷓鴣啼

東峯白雲院

僧愛白雲谿上飛
白雲飛處敞禪扉
莫言便是無心物
憶著故山依舊歸

采石四詠

溫嶠

半夜燃犀采石江江神無處避餘光未應赤幘能為害
窺見淵魚已不祥

袁宏

袁郎風格抗浮雲詠史高吟世未聞乘月泛江今古有
不知誰是謝將軍

李白

一別蓬宮不計年錦袍吟醉釣魚船鑑湖賀老天機淺
輕向人間號謫仙

樊若冰

兵到金陵舉國降若冰謀策謂無雙由來天意歸真主
何必舟梁始渡江

濂溪

山為羌仙傳舊姓溪因廉士得新名願持一勺去南海
直使貪泉千古清

留題城西水磨

客來亭上脫春衫馬浴寒泉洗轡銜怪得主人留再住

水聲林影似江南

贈范魯仲

人急生前計子圖身後名重來天地遠誰為作權衡

賞梅呈仲元

十年不見錦江梅今日清香入酒杯太守為施紅步障
郡園驚怪壽陽來

瑞香

孤根移自紫霄峰只鬪清香不鬪紅憶得婆婆一株桂

歐家曾見月屏風

文忠公家有月石屏風
內有一桂與此相類

訪吳尉不遇

人愛紅塵我愛山
尋山重叩白雲間
子真避客遊都市
月上梧桐未肯還

隱靜十八松

廬山社友皆逃晉
秦府功臣不仕隋
今日明堂求巨棟
好教天下匠師知

碧霄泉魚

巖深蔭薜蘿金鬣弄寒波莫愛江湖好江湖罾網多

遊白雲山醉題僧壁

買得青山不用錢金沙門外草綿綿黃梅老令醉欲倒
擬借白雲今夜眠

野寺

澤國春風老雜花間芳草門前車馬稀竹葉無人掃

山房枕上作

十里溪源尋未見忽逢茅屋白雲堆竹牀紙帳睡正穩

無奈野猿驚覺來

天台思古

遊人行盡天台路
山家杳杳知何處
唯有山前一派溪
落花依舊流春暮

還慶師扇

贈我無心著還師
理亦然秋風歸舊谷
明月上青天

無為集卷七

欽定四庫全書

無為集卷八

宋 楊傑 撰

序

皇族服制圖序

議曰禮院新定皇族五服圖其失有五不重太祖太宗
真宗之服其失一也不分潤王之族其失二也不載兄
弟之殤其失三也不著袒免之親其失四也不明正統
旁親之制其失五也何謂不重太祖太宗真宗之服按

周禮司服職云為天王斬衰禮記云天子修男教父道也為天王服斬衰服父之義也又云喪有四制變而從宜取之四時也有恩有禮有節有權取之人情也恩者仁也理者義也節者禮也權者制也仁義禮智人道具矣故為父斬衰三年以恩制者也為君亦斬衰三年以義制者也新圖以皇帝於仁宗固當服斬衰也於真宗則齊衰不杖期也於太宗則齊衰五月也於太祖則總麻三月也若仁宗之服誠合禮制矣若真宗太宗之齊

衰太祖之總麻是以親服而言而不以天王之服言也
夫太祖太宗真宗君天下傳萬世在皇帝為之服斬衰
此所謂以義制者也親親尊尊無重於是矣新圖以齊
衰總麻為服是豈達禮經之意哉故曰不重太祖太宗
真宗之服其失一也何謂不分潤王之族按五服勅云
為人後者為其父母齊衰不杖期為其兄弟大功九月
然則皇帝為濮王之服異於為潤王諸子之服矣為濮
王諸子之服異於為潤王諸孫之服矣新圖以潤王子

孫合而為一無以別其等降故曰不分潤王之族其失
二也何謂不載兄弟之殤五服勅云為人後者為其兄
弟之長殤小功三月為其兄弟之中殤下殤總麻三月
開寶通禮喪葬令文皆同其說蓋出之於儀禮矣而新
圖略之故曰不載兄弟之殤其失三也何謂不著袒免
之親按禮記大傳曰名者人治之大者也可無慎乎四
世而總服之窮也五世袒免殺同姓也六世親屬竭
矣鄭康成云四世共高祖五世高祖兄弟六世以外親

盡無屬名也又按律有八議一曰議親釋謂皇帝袒免以上親刑統云皇帝袒免據禮有高祖兄弟曾祖從父兄弟祖再從兄弟父三從兄弟身四從兄弟是也且五世之親旁通而有十一刑統止著其五識者猶曰未達况又全而闕之哉故曰不著袒免之親其失四也何謂不明正統旁親之制夫正統之服天下之通服也旁親之服大夫則異於士庶矣天子諸侯則又異於大夫矣按禮記云期之喪達乎大夫三年之喪達乎天子父母

之喪無貴賤一也鄭康成云期之喪達乎大夫者謂旁親所降在大功者其正統之期天子諸侯猶不降也大夫所降天子諸侯絕之不為服也孔穎達曰大夫之尊猶有期喪謂旁親所降在大功者得為期喪還著大功之服若天子諸侯旁親之喪則為服也又儀禮喪服鄭康成注云君大夫以尊降賈公彥云君大夫以尊降者天子諸侯為正統之親后夫人與長子長子之妻等不降餘親則絕天子諸侯絕者大夫降一等又漢白虎通

德論天子絕期者何示同喪於百姓明不獨親其親也
又魏田瓊云天子不降其祖父母曾祖父母后太子嫡
婦其姑姊妹嫁於二王後者皆如都人此所謂正統旁
親之制也古者分親所以尊正統也尊正統所以重宗
廟社稷之事也雖聖人親親之心篤於九族而旁正之
異不可不明也而新圖略之故曰不明正統旁親之制
其失五也今別為圖分以世次上下旁行而觀之親疎
輕重之制其亦庶乎明矣

國朝宗室世系表序

漢有王子侯表唐有宗室世系表其子孫之盛概可見矣然漢表止於王侯王侯以降族裔不可得而知也唐表略於明皇明皇以後本支不可得而詳也夫宗室為邦家所重其簡闕若此豈非紀事者之失歟國朝之制凡宗室行封襲慶賚之典有婚姻喪祭之事雖命令所出本乎朝廷而法度參考必先禮籍是以宗室世系戚疎遠近之別尊卑長少之序為禮官者所當審考而詳

明之也某備員太常積有歲月參考典禮茲固所職其
於戚疎遠近之別尊卑長少之序敢不盡心哉而有司
之所記者先後詳畧多或異同檢用之際竊懼差失迺
推究源流作國朝宗室世系表太祖之子名以德德生
惟惟生從又生守從守生世世生令令生子太宗之子
名以元元生允允生宗宗生仲仲生士泰悼王之子名
以德德生承承生克克生叔叔生之之生季曰德曰元
者宣祖之孫也曰惟曰允曰承者宣祖之曾孫也曰從

曰守曰宗曰克者宣祖之六世孫也曰令曰士曰之者
宣祖之七世孫也曰子曰季者宣祖之八世孫也首著
謚號名推爵德也屬次之親親也子孫次之源深而流
長也謹序

熙寧太常祠祭總要序

國朝歲祿天地五方帝神州宗廟大明夜明大社大稷
太一九宮臘禘為大祀文宣武成風師雨師先農先蠶
五龍為中祀壽星靈星中雷馬祭司寒司中司命司民

司錄為小祀凡太常典禮樂少府共服器光祿共酒齊
黍稷果實醯醢將作共明水明火太府供香幣太僕共
牛羊司農共豕殖有司應命人或為之騷然熙寧四年
冬詔以諸寺監祠事隸於太常所以肅奉神之禮也太
常初置主簿傑首被命至局之日寺監羣吏各執故習
惘然不知祭祀之聯事傑迺集諸司所職為旁通圖一
卷以示之於是上知其綱下知其目大事從其長小事
則專達郊廟羣祀渙然易明有司百執各揚其職職事

相聯罔不修舉命曰熙寧太常祠祭總要云

補正三禮圖次篇序

周禮六篇首曰建國國建而其所重者天地之丘壇祖宗之廟貌也三者既安則不可無宮室庠序之嚴衣冠車旗之飾寶貨物用之利物物得正和樂生焉有所未和和之以樂有所未正正之以威物正於國則厯象順於天厯象順於天則災咎消於物格災咎於一時傳簡書於萬世故禮圖之次一曰地制

卷八

二曰丘壇

卷三

三曰

宗廟

卷二

四曰宮室五曰庠序

卷一

六曰衣冠

卷三

七曰車

旗

卷三

八曰寶貨

卷一

九曰物用

卷三

十曰樂制

卷一

十一曰武

制

卷二

十二曰厯象

卷三

十三曰失令災應

卷二

卷二卷通圖議
三卷序目三卷

為三十
八卷

伏惟聖主覽其所圖鑒其所次法其所大法行

其所未行致休祥為簡書之傳無災咎為號令之應厯

象得而順禮得而正樂得而和寶貨物用得而利衣冠

車旗得而飾宮室庠序得而嚴丘壇宗廟得而安天下

之地得而制然後聖神宗支傳億萬載此愚臣次篇之

意也

平律書序

世之所以治者以人之和也導其所和莫深於樂樂之所準在乎律呂是知律呂者大樂之權鑑而世治之本原然而上聖立法後世難知為之物惟三謂玉銅竹正之

之法惟五

謂數聲度量權

相生以八

如黃鍾至林鍾林鍾至太簇之類

損益以

三

謂下生者三分損一上生者三分益一

禘祭則不用商聲

謂三大禘律呂不用商

變聲則止於宮徵

謂七聲有變宮變徵

六管上下班志有所差

謂

賓夷則無射損而下生大呂夾鍾中呂益而上生

三統餘分遷史有所失

謂黃鍾長

八寸七分太簇長七寸二分二林鍾長五寸七分四

若此之類義深者多故臣著

平律書三卷律呂圖三卷以明之所以副尊號皇帝景祐修樂之至意也謹序

楊氏世譜序

楊氏姬姓也其先曰尚父伯僑蓋周武王第三子唐叔虞之後始封為楊侯楊侯生文文生突晉之公族食邑於羊舌突生職惠公上卿職生肸字叔向亦曰叔譽晉

太傅食采楊氏邑肸生伯石字食我以邑為氏號曰楊石伯石生章征東大將軍華山侯始居華陰章生欸字太初秦上卿後除弘農始作家譜以示子孫欸生碩字弘遠隱居華山仙谷見五星聚東井知漢必興後為太史碩生喜字幼羅從漢擊項羽封赤泉侯謚曰嚴喜生敷字伯宗襲封赤泉侯謚曰定其後為新昌院敷生肸字無害襲封赤泉侯肸生敞字君平任大司農御史大夫封安平侯預謀立宣帝拜大丞相敞生忠封安平侯

謚曰頃忠生譚字君公大鴻臚卿屬國安平侯譚生寶
字稚淵漢明帝三詔不出謚曰靜節先生嘗有靈雀銜
環之瑞寶生震字伯起漢太尉稱關西孔子畏四知惟
忠孝清白以傳子孫震生奉字季節後改名衆字君師
任諫議大夫河東太守遷中書侍郎奉生粵漢黃門侍
郎其後為東垣宜陽房粵生纂字叔緒獻帝時太中大
夫封常山王纂生品字文璨魏文帝時太中大夫品生
國字彥高晉武帝時弘農令國生準晉太常準生林其

後為滎陽房又蜀中院譜林乃準之後林生鉉鉉生結
仕慕容氏中山相結生繼繼生暉洛州刺史謚曰簡暉
生恩河間太守恩生鈞魏朝越國公謚曰恭鈞生儉一
名倫字景則西魏時封夏陽靖侯倫生文昇字文殊隋
刑部尚書文昇生安仁安仁生德德生立立之孫曰隱
朝為郃陽令隱朝生燕客臨汝令燕客生寧國子祭酒
寧生漢公字用乂為天平軍節度使檢校戶部尚書其
後為淮南院蜀院閩院漢公生範字憲之楚州刺史範

生玠字表文吏部尚書監察御史其後為揚州丹陽房
玠之孫徽字隱父初自靖康里挈族來淮南是為淮南
府君徽生南宅府君曷橐臯府君杲杲生濡須府君德
明德明生富字文翁次大夫復字庶幾次試秘書省校
書郎寓字晏之富生僖介佾僕佃復生傑傳佶作佺寓
生佻仲依傑生洙滋泳浩傳生滂伋生濠汶作生枹樸
榛佺生涇洞洙生堯叟滋生襲吉襲圭是為淮南院子
孫熙寧元年同南海監郡尚書郎沆及其子上卿客卿

列卿會於豫章兩院各出世謀若合符契至元豐四年
秋傑以禮官准詔祀華嶽乃拜太尉祠冢訪講堂藏書
穴酌阿對泉於龍岡道過好陽省五公墳畫圖隱碑以
歸參考宗文得閩鄉華陰譜本末尤詳元祐五年歲次
庚午三月吉日重書於會稽妙峯亭第四十七世大宗
左朝請郎尚書禮部員外郎傑序

獻詩賦序

彭城古之楚也山陽今之楚也古楚之劇其猶今楚之

劇也古舉其守亦猶今之舉其守也在東漢則袁邵公
以能理劇為三府之舉而守彭城在本朝則中都公以
能理劇為牧伯之舉而守山陽古今雖異易地則同而
自下車之初躬卽庠序振起風教修衛桂陽之故事是
以庠序之士首形詠歌傑幸為諸生之師而耳目盛美
故擇題於表衛二傳以理劇拜楚守賦下車修教詩為
十八日之課文在於彼而義在於此將使編民知良二
千石有古君子之風云爾伏蒙傳命見索所撰謹與諸

生之課上獻浼瀆視聽無任悚惕之至

大樂十二均圖序

大樂十二律律各有均均有七聲更相為用聲協本均則其樂調聲非本均則其樂悖非獨雅樂若此至於燕樂亦莫不然唯工師之明於聲者則能知之工師知其聲而不能知其本因聲以求本窮本以知變儒者之事也今黃鍾為宮則太簇姑洗林鍾南呂應鍾蕤賓七聲相應謂之黃鍾之均餘律為宮者倣此禮曰五聲六律

十二管還相為宮漢志曰宓義氏作易紀陽氣之初以
為律法建日冬至之聲以黃鍾為宮太族為商姑洗為
角林鍾為徵南呂為羽應鍾為變宮蕤賓為變徵此聲
氣之元五音之正也夫五音相生而獨宮徵有變聲者
何也曰宮為君商為臣角為民徵為事羽為物君者法
度號令之所出也宮故生徵法度號令所以授臣臣所
以奉承者也徵故生商君臣一德以康庶務則萬物得
所萬物得所則民遂其生矣故商生羽羽生角也然臣

有常職民有常業物有常形形不可以遷遷則失其常
矣商角羽三聲此其所以無變也君摠萬化不可以執
一方事通萬務不可滯於一隅故宮徵二聲必有變也
今著大樂十二均圖一卷既備載律呂宮調又各取一
章附於篇按圖考聲下可以辨工師之能否窮本知變
上足以贊聖明之述作云爾謹序

無為集卷八

欽定四庫全書

集部

無為集卷

九至
十一

詳校官庶吉士臣何道沖

檢討臣何思鈞覆勘

總校官庶吉士臣朱鈐

校對官中書臣王鍾泰

謄錄監生臣沈一鶚

謄錄監生臣畢所誼

欽定四庫全書

無為集卷九

宋 楊傑 撰

序

祝先生詩集序

先生諱熙載字舜咨自三衢游國庠登進士第任朝奉
郎守秘書丞老於吳之華林先生悟風騷蓋其出於天
性幼時見鄰家童誦劍池詩云林風搖晚影山月瀉秋
光時六歲遽諭之曰豈非林風搖晚影耶傳者誤爾鄉

先生許洞聞而奇之及冠塲屋有聲名和文李公以禮幣延致門館與其二子遊厥後皆稱賢公于先生屢校文郡國得人為多丞相王祁公初應書時人未知名先生首薦之而魏中昂科及典誥命文章溫瞻天下莫不服先生之鑒然未嘗以毫髮有干於相府天下益高先生之節平生與人交必盡誠不隱默以取悅其為政端方耻阿諂以事上故與時寡合志不得伸而其造道深篤於名教中自有樂地出處趣尚一見於詩夫莫邪干

將有切玉之利而其用緩於割難黃鍾大呂有格神之
和而其音艱於衆聽靈草指佞而姦邪憚之寶鑑燭隱
而魑魅惡之某嘗出先生之門知先生為最深故述詩
序云

唐史屬辭序

仁宗皇帝嘗謂商周以來為國長久惟漢與唐不幸接
乎五代衰世之士氣力卑弱言淺意陋不足以起其文
而使明君賢臣雋功偉烈與夫姦虐皆不暴其善惡以

動人耳目誠不可以垂勸戒示久遠乃詔修舊史以成新書是時內出四庫所藏外訪求遺事於天下若文集誌刻野語逸史蒐索殆徧而其刪定討論皆一時儒學之士凡十有七年而後成於是與漢晉諸史方軌並駕以垂無窮吁可謂盛矣嘉祐中其書新出而天下之士傳錄誦讀惟恐其後時無為程鵬彥昇篤愛是書乃采一代事迹四言成文兩兩相比題曰唐史屬辭總成四卷其於善惡邪正雖皆因其傳文而於輕重諧偶若權

衡然可謂勤且至也觀者用力少而收功多將求鏤版以廣其傳丐予以為序彥升有學行予科場友也初命錢塘掾上官稱其材將見其所施設此未足以為彥升道元祐元年閏二月一日泗州青陽述

五代紀元序

有唐之衰五代起於藩鎮梁祖始以姦雄窺竊神器雖天下畏其強盛而弑逆之禍在於閨門君不君臣不臣父不父子不子於梁氏備之矣欲永其世不亦難哉夫

亂臣賊子人人棄之棄其所共棄而動之以言故末帝
得以誅友珪而代之然而唐德深厚人心未忘此後唐
之所以興也武皇征伐屏翰之功初與梁祖相後先而
梁祖終於取天下武皇終於藩國千載而後梁祖首篡
竊之罪武皇保忠義之名善惡之致何其殊如是耶莊
宗克成父志勇於征討平定梁氏中興唐祀議者稱之
至於溺惑聲伎吝嗇賞賚此其所以亡也所謂暴威武
者或困於聲色之娛屯其膏小貞吉大貞凶莊宗有之

矣莊宗明宗閔帝廢帝四世三族姓異號同同尊唐室
致有唐廟貌雖石晉之代亦宗祀之而不敢廢乃武皇
莊宗之力也晉高祖利建大號以君父事契丹及少主
嗣位欲正名分召徠敵寇割裂中夏人主后妃蒙塵異
域皆高祖之罪也漢高祖有赴難之迹惜哉不克成其
功當中原無主之際徇輿議而卽位不猶愈於僭竊者
乎隱帝不能駕馭英雄潛行誅戮傾覆宗社誠自取之
爾周高祖世宗可謂英武也已而其享國不永恭帝沖

幼謳歌不歸斯蓋歷數在乎真主非人謀之所及也五
十三年之間生靈困於塗炭王道衰而不振史氏蕩而
無法秉筆之士為之歎息嗚呼十三主有君天下之勢
而無君天下之道君無其道則賞罰有所不明君有其
勢故紀元之法以託之也或曰編年繫事必具四時在
紀元則梁祖不書春莊宗不書春夏秋者何為也曰
唐歷未終不可以與梁也梁歷未終不可以與後唐也
不與之所以正正統也正統不正何以正天下哉治平

三年春正月序

補編年圖序

編年圖任山先生之所撰也始自周平訖於聖宋歲之
甲乙列於上國之年世列於下稽諸史牒咸得其實先
生授于建谿張君子於張君而得焉周平而上或患其
闕因自堯舜而補之夫先生之圖祖春秋也某之所補
祖斷書也聖人之法相為表裏不亦可乎皇甫謐曰堯
生甲申歲孔安國曰堯年十六以唐侯升為天子故即

位於己亥也書試舜之年曰朕在位七十載故試舜於

戊申也試舜三載曰汝陟帝位故舜攝於辛亥也二十

八載帝乃殂落

自舜攝之年

其崩於戊寅也舜生三十徵庸

故舜生於己卯也三十在位

歷試二年攝位二十八年

故即位於庚

辰也禪禹於壬寅也正月朔旦受命於神宗故禹攝於

癸卯也五十載陟方乃死故崩於己巳也史遷曰舜崩

三年而禹即天子位故禹即位於壬申也皇甫謐曰夏

啓元年歲在甲辰禹當先啓三年而崩故崩於辛丑也

皇甫謐曰禹年百歲故生於壬戌也又曰啓立十年而崩故崩於癸丑也自啓至於周之共和不得而補年紀不明故也惟汲冢紀年曰夏有王無王用歲四百七十一有一故夏亡於壬戌也夏既亡商宜有天下於次年故湯踐位於癸亥也皇甫謐曰湯踐位十三年而崩故崩於己亥也汲冢紀年又曰湯滅夏以至於受用歲四百九十有六故商亡於戊寅也商既亡周宜有天下於次年故武王踐位於己卯也共和而後皆據史遷年表而

補之噫自啓至於共和年祀不明則有矣世次可得而明故載為三代世譜時皇祐二年二月二十六日序

楚風序

楚風者何楚人美太守之詩也詩有四始曷為謂之風本乎師乙之法師乙曰正直而靜廉而謙者宜歌風進身以道吾太守之正也不為勢曲吾太守之直也仁不撓物吾太守之靜也介潔自守吾太守之廉也按士降已吾太守之謙也故楚人之詩有美正直而靜者有美

廉而謙者得師乙歌風之法是以謂之風也

清獻趙公壽塋頌序

元豐二年春資政殿大學士太子少保趙公連章得謝
歸於三衢是年冬卜壽塋於先塋國令公兆域之側乃
自作頌題於壁間後五年公薨天子聞訃震悼輟視朝
優賜賻典以太子少師告第太常攷行以清獻易名尚
書省集議僉以為當朝廷從以謚焉古未有也公子玘
初辭御史又辭太僕丞願就養於南國上嘉其世孝詔

提舉兩浙路常平廣惠倉以便養志也及遭鉅創每視
壁間所書頌則號慕殞絕思刻石以廣其傳乃屬某以
為序某聞患莫大於愛生累莫重於畏死至人無已悟
其本不生故其存也無所愛達其未嘗滅故將亡也無
所畏惟其無愛無畏乃能致其忠竭其孝一其誠而冥
於道至於不隕穫於貧賤不充詘於富貴見利不虧其
義見死不更其守其餘事也公之頌章首曰吾政已致
蓋戴吾君從其乞身之請退而不敢忘其忠也次曰歸

此山地蓋言吾親全而生之已將全而歸之沒而不敢
忘其孝也又曰彼真法身不即不離蓋了覺本源實無
生滅一其誠而冥於道也公其至人乎來者觀其頌則
知公之所存矣八年冬某被命典客訪道南游將還京
師得公子書至武林乃為序云

石聲編序

嘉祐五年夏四月儂智高叛廣南晉康太守趙公死於
難夫賊勢不可敵而太守敵之不曰勇於義乎去晉康

則可以生而太守不之去不曰固其守乎既知其不可敵又知其不可去而太守不自屈其節而死之不曰忠於國乎故聞太守之風者庸懦之人激而勇苟生之人激而守姦邪之人激而忠有是三者之大節而為教於天下天下賢君子得不聞而稱之乎是以具於奏牘者二狀其行事者二銘表其墓者三記於祠堂者二形於聲詩者不可遽數太守之弟殿中丞世弼集其所得詩以示傑且以序見託傑按樂記曰石聲磬磬以立辨辨

以致死君子聽磬聲則思死封疆之臣請名其集曰石聲編將使萬世君子見其詩思其人其猶聽石聲而思之云爾太守諱師旦潛叔其字也

講周禮序

周禮者周公建六官致太平之書也公以聖人之德極輔相之尊通天下之志成天下之務故能作是經述是禮為萬世之大法也其略見於周官其詳載於六典六典者何治教禮政刑事也治無不統天之道也天官冢

宰以掌之教無不容地之道也地官司徒以掌之和豫者禮其序春也春官宗伯以掌之正大者政其序夏也夏官司馬以掌之肅嚴者刑其序秋也秋官司寇以掌之富有者事其序冬也冬官司空以掌之治則不言而化也教則見于言矣禮則見於容矣政則見於令矣刑則見於威矣事則見于物矣此其精麤先後之序也六官帥其屬三百六十期之日也自天子諸侯至於公卿大夫貴賤莫不有位自王畿至於侯甸男采衛要蕃遠近莫不有制自天地

宗廟至於百神祀享莫不有常自正月之吉至於歲終施
為莫不有時自人至於鳥獸草木養之必有其道自宮室
至於車服器用制之必有其法無一職不修而王道備無
一物不化而歲功成此所以致太平而敬天命也不幸遭
罹秦火絕滅典常出自山巖遽藏秘府冬官亡失既不獲
其完書士儒相傳久已弊於俗學聖上憫其若此命儒
臣以訓釋旨歸列之科選使成周太平之迹煥然著明
於本朝誠千百年希闊之遇也然而執形器度數之學

者不知制作之所存泥道德性命之說者不能考合以適用蓋學禮者之所蔽惟不執不泥然後能盡變通以致用上以副朝廷經術造士之意不其盛歟

題跋

題孔融四公頌

華陰靖節先生寶九歲時放一黃雀其夕有一黃衣童子再拜曰我王母使者感君仁愛救拯實感存濟授以四白環令君子孫潔白位登三事當如此環其後震秉

賜彪四世太尉德業相繼及曹操欲害彪時孔融為將
作大匠聞之往見操曰楊公四世清德海內所瞻今橫
死非辜則孰不解體融魯國男子明日便當拂衣而去
操不得已而出之觀頌詩則見孔公之誠心矣此卷翰
書竒古有御書印及空闕景皇神堯諱驗是唐朝內府
所藏靖恭楊氏世世傳以為寶其世字民字尚未諱者
蓋貞觀以前書也

題范文正書伯夷頌

伯夷避位孤竹責仁於周義不食粟死於首陽可謂聖人之清已其於時也不亦難哉文正公書伯夷頌時今中書丞相侍行青社三十年間繼登宰輔澤被四海有若伊尹格於皇天有若伊陟格於上帝蓋千載一時也元祐四年四月四日權發遣兩浙提點刑獄公事楊傑謹題

題慧應大師運氣經絡圖

五音之變六律之序治樂者不可不知不知是而考擊

成聲者豈非偶諧歟四瀆之源百川之會治水者不可不知不知是而疏導有功者豈非幸中歟黃帝之書醫家所重詳究其義五運六氣猶樂之五音六律也十二經絡猶水之四瀆百川也安可忽之哉余久官奉常屢被詔攷校太醫官學者之於運氣經絡通者亦鮮然後知醫術之為難矣昨見錢唐慧應大師智全所出五運六氣十二經絡圖因召而攻其所學本末皆見於黃帝之書蓋家世師承有所自矣講學之暇益精於此其濟

人之心孰禦焉元祐元年三月二十有九日洞庭舟中

題

題浮渡山峯巖圖

潛叟樂山水至浮渡樂而甚故為山之峯巖圖一曰安為其可以居也二曰怪為其有所象也三曰險為其往之難也四曰幽為其邃而異也居廣泉甘安之上也有一不及安之中也有一不足安之下也象而近之怪之上也象而或差怪之中也象而或疏怪之下也人不能

往險之上也往而惕然險之中也往而或惕險之下也
既邃且異幽之上也有一不及幽之中也有一不足幽
之下也已而示於達翁達翁笑之曰子所謂安安之常
也子所謂怪怪之常也子所謂險險之常也子所謂幽
幽之常也吾聞之大安不居大怪不象大險不難大幽
不邃安乎怪乎險乎幽乎在於是圖忘其圖不盡山之
勝乎此巖圖其來固久歷世狀者不知其幾人矣其如
形勢尚未之辨則其安怪幽險又焉所及乎金陵僧慧

淵善於水墨丹青非獨能辨其形勢至於安怪幽險悉
精妙乎筆端實與造物者爭其先後也或平昔樂於山
川者縱未達是境若披是圖亦可以盡得於心目矣

無為集卷九

欽定四庫全書

無為集卷十

宋 楊傑 撰

記

洪州門記

今天子即位元年春三月己巳洪州初以州名表於門
何以書重正名也豫章之水源於虔化會貢水而為贛
東北至於洪崖之陽漢置郡曰豫章因水名也隋易郡
曰洪州因山名也唐治軍建節曰鎮南制遠俗也偽唐

僭稱南都避中原而卜遷也皇朝削平僭偽聲教被於四海州名從隋仍舊貫也鎮名從唐存武備也鎮名則有節度使以領之州名則有觀察團練刺史以領之是二者之名不可闕其一也而鎮南之名固已表於府門矣惟州名則闕然未之表也兵部施公出守是邦以德義鎮俗事為有本廼命以州名表於中門表之所以正名也正名可書不可不書故書

西水磨記

都城當萬國之要會升平日久比屋富庶四海內外寶
貨叢聚車無停軌馬無緩轡晦明寒暑衝衝交馳乎其
間有闐闐之喧所不及處已不可多得而況流水潺湲
嘉木翳鬱魚鳥上下風物清勝有山林江湖之氣象者
乎都下水磨務有三皆國朝所置以供尚食暨中外之
用然其景趣不同而所謂有山林江湖之氣象者西務
是已將造其門水聲先出乎林間行及其旁則長槽瀉
波鉅輪激濤雷轟電射雪迸雨飛若並谷簾若臨洪崖

使人毛髮森然語言不能相接有景如此而都人罕有
知者自宛陵梅平叔太原王漢卿之領是局也薦紳往
徃至焉主人嘉客之來臨流設樽拂石為坐垂釣清淵
魚泳而同食彈琴曲渚鷗馴而不驚沙泉盈尺趺可以
涉漁艇一葉醉可以卧方是時也賓主陶然如在江湖
之上山林之中烏知車馬闌闔之喧哉朝野諸公多有
詩詠或形汗簡或題屋壁凡數十篇漢卿官滿懼異日
之遺墜乃鑱諸石以傳永久知予尤愛其景故託以為

序蓋所願也元豐二年中秋日述

淮陽古井記

淮陽之井鹵而少甘其民多汲於沂泗光祿卿劉公之守是邦也問風俗而始知且歎之曰一郡之井不為少矣胡為斯民捨近易而趨沂泗哉謂井不可食豈其然乎於是使人徧汲郡井而嘗之俄於後圃榛莽之間得廢井焉其泉冽然若冰而甘以之烹茶則茶浮而味久以之釀酒則酒醇而色清又以舊所畜揚子南濡水及

惠山泉以校之則輕重幾乎等矣爰命缶以出其濁石以潔其外亭以覆其上由是瓶罇不絕汲者便之予道過淮陽得其語於郡人公且以記見託予聞井者德之地也古今有變而井不變猶士君子之有常德乎故井不患乎不汲患乎泉之不冽士不患乎不用患乎德之不脩泉既冽矣德既脩矣人或不之汲世或不之用非井與士之不幸蓋物不幸不得其利爾噫斯井也前此幾千百年荆榛蔽之泥沙混之禽所不窺人所不食豈其

泉之不洌耶曷其湮塞之若是耶使秉權者有能推劉公求井之心以求賢則豈獨能輔天子之明且足以均天下之澤矣易曰井渫不食為我心惻可用汲王明並受其福此之謂也治平三年五月十日無為某記

二軒記

臨潁令楊彥武謂無為子曰我山陽嘗構二軒於燕習堂之東北隅二軒之制不侈不陋聚書萬卷足以示子孫潔嚴豆觴足以奉賓客累石以為山無摧輪折軸之

險而蒼翠可愛鑿石以為沼無狂風怒濤之畏而清泚可鑒也野芳秀而香不知所從幽鳥啼而聲不知所起每閑戶宴坐陶然自得頓忘身世之累行將解紱綬之縛而歸休其間因名其一曰覺軒其一曰息軒蓋覺性未悟求悟者指之息心自信求信者言之指而言之非予而誰夫並萬物而生於天地間其靈貴於萬物者人之謂也鳥獸蟲魚惑於所嗜嗜而不能自息此其所以為人獲也夫學而有見者覺也自心而休者息也不學

則不能自覺無所覺則不能自息覺則不惑於所嗜息則不困於所動其幾於道矣昔人言有畏影惡迹而去之走者舉足愈數而迹愈多走愈疾而影不離身不知處陰以休影處靜以息迹是豈足以語二軒之意歟元豐三年秋七月記

養志堂記

親心所嚮謂之志善承順者謂之養子之事親養志為大養體為次故元之於參不若參之於哲此孟子所以

優稱其孝而孔子授以經也於戲曾子世不得而見之
得見慕曾子者其亦庶乎鉅鹿魏丞綸即龍圖公之嗣
子也為知者所辟將擢以任君辭所舉而以潯陽權酤
為請便親養也是時仲氏官於豫章兩境相望不數百
里太夫人所至安問交馳晨昏寢食怡怡如也諸大夫
以是稱之而名斯堂為養志云無為子聞之曰事親孝
者忠可移於君古者求忠臣於孝子之門良有以也然
而有隱無犯事親之道也有犯無隱事君之道也色難

之難猶犯顏之難不難其難其孰禦焉篤於誠而已矣
熙寧三年八月十五日記

九華藥圃記

九華山多產靈藥樵蕪耕獵居人游士日往來於其間
而罕能辨識故其藥初不見用於世藥之見用非藥之
幸迺病者之幸也藥不見用非藥之不幸迺病者之不
幸也昔有至人過其山別其名品以示人曰此養命之
藥也此輔性之藥也此治其疾之藥也用之莫不然由

是九華靈藥多載方書山中之人悉能辨識蓋有所自
矣永靜太守南陽滕大夫潤之家於池州州距山甚邇
嘗築圃於所居之西擇九華之藥可以種者種之可以
移者移之分畦以別其品立石以識其名清泉灌沃澤
根本也惡草鋤去養善類也不雜花卉悅不在目也不
植蔬果嗜不在味也藥齋居中用藥之書聚焉藥軒在
北治藥之器具焉華實根葉采之有時君臣主使處之
有序以之攻疾疾無不痊以之施人人蒙其惠於是藥

圃之名傳於縉紳莫不慕大夫之所存無為子聞之曰
噫是烏足以盡大夫之所蘊歟大夫之先內閣公在祖
宗朝嘗獻苦口之忠言上以醫國建去害之長策外以
安邊人到於今賴之大夫承義方之訓性治行修平生
懷濟物之術所至必蠲民之瘼讀家藏儒釋道諸書愈
久愈深其學博而不自矜其善積而不自有在老氏曰
滌除玄覽能無疵矣在圓覺曰於大乘中發清淨心遠
諸雜病矣乃知藥圃之設為恤物之一端烏足以盡知

大夫之所蘊乎元豐八年五月十一日記

秦氏中齋記

齋學舍也君子居而齋肅焉故曰齋中名之從筮也皇

祐元年冬十有一月朔秦君學舍成索太玄而筮之遇

中三

一方一州一部一家天首也家性
曰星曰牽牛時曰冬至數曰奇

楊某辭之曰星

舍於北與首同德冬筮而冬在時曰從畫而逢陽廼數

之祥一之文曰賢人天地思而包羣類也居之者其潛

心之遠乎五之文曰君子乘位為車為馬車軫馬駟可

以周天下居之者其將獲用於時乎七之文曰仁疾乎不仁誼疾乎不誼君子寬裕足以長衆和柔足以安物居之者其將能任於刑德乎是之謂星時數辭從故名之而記于壁

采衣堂記

婺源胡氏五世同時子養其父而逮養其祖之祖父鞠其子而及鞠其孫之孫州閭鄉黨推為令族嘗構堂於家園宅風物之勝處羣峯環翠屏如也寒泉湛碧鑑如

也幽芳啼鳥愛之而不可勝名老木脩竹蔭之而不可勝筭每晨昏燕閒親族咸集老者坐於上稚者戲於下長者侍於側少者服其勞山樽棗餽具不待豐而人以爲甘矣況有豆觴之奉乎鳴缶擊壤樂不待舉而人以爲和矣況有簫鼓之繁乎頽垣隘宇居不待壯而人以爲安矣況有大廈之庇乎弊裘緼袍服不待侈而人以爲楚矣況有采衣之絢乎乃祖乃父乃子乃孫雍雍怡怡以遨以嬉歲月久而不厭齒髮晚而不衰縉紳大夫

樂為歌詠以勝於堂目其堂曰采衣蓋取老萊子之養以美之也既而聞於京師求無為子以為之記無為子曰前此百有餘年僭偽未克日尋干戈父不得保其子者有之子不暇給其父者有之矧有五世一時而安居者耶觀胡氏采衣之樂則海宇升平之久可知矣是可書也熙寧六年重九日記

雜文

世網篇

達翁居於淮之濱潛叟過之而舟於淮潛叟東指謂達翁曰樹林之陰頂笠裘蓑者有所負乎翁曰網叟曰烏乎用翁曰茲取魚具也且世亦有網君知之乎叟請達翁因有世網說昔伏羲氏之有天下也受圖書肇人文納百姓於治而百姓不知其所以網因作田魚之器以明己之用故易曰顯諸仁藏諸用百姓日用而不知然則世之網經營於此乎已而授神農氏神農得而歸天下之民獲天下之貨及其世衰子孫不能張焉故有軒

轅氏生以正其綱紀綱紀既正以之授少昊少昊以之授高辛高辛以之授摯摯受之而不能舉且罹洪水之患網之綱幾乎頽聖弟放勳亟命鯀以治水鯀功不成而繼以文命文命獲洛書而能治之水患既平網亦以緝故書曰天錫禹洪範九疇彛倫攸叙堯既張之而民亦不知其張有擊壤而歌者曰日出而作日入而息鑿井而飲耕田而食帝力何有於我哉堯以舜賢而授舜舜以禹有功而授禹禹以授啓自啓而後世失其人縱

田獵而瀆之者有之矣樂酒色而亂之者有之矣故墜
于弛廢而不舉湯患於意者久之因出見網張于野不
知意之形於聲曰自天下四方皆入吾網已而懼言出
之而遇桀之刑因就變曰吾不忍盡取禽獸盡往歸焉
且不知其入湯網也歷數世而子孫暴亂其網之墜猶
夏后氏之末世西伯昌興而叙之故其詩曰勉勉我王
網紀四方西伯以之授武王武王受而大闢之以納天
下故其詩曰自西自東自南自北無思不服武王以之

授成王成王守之而正天下故其詩曰受福無疆四方之網及其世衰則有諸侯干紀以亂其叙故雄曰周網解結群鹿爭逸自時而至五代蠹網家流出焉或執器而斷之或闢路而逃之人有識其器達其路則陶陶然熙熙然不為是非哀樂動其心不為得失生死累其正君子以之靜小人以之亂非叟不可使之知知是網其知幾乎

南山移文 并序

繁昌之南有山曰隱靜其林泉為江東之勝物外之人
多或樂之吳越江逸人愛而不能去無為子遊必見焉
逸人一日出山久而未歸無為子惜其不返將督人以
歸因思齊朝周彥倫嘗隱於鍾山後出為海鹽令欲再
過其山孔稚圭乃假山靈之意移之使不許得至故云
北山移文責於已失不若救失於未然使其不得至
不若督之以歸故作南山移文且以簡於山居二師云
繁昌之境南山為勝君子有時而隱仁者所樂乎靜松

敞重門石開修逕玉淙琤乎雙溪屏回環乎五嶺旦禽
啼而杵藥夜谷響而鳴磬子虛之洞兮鍊九鼎而雲飛
碧霄之泉兮涵萬象而月瑩昔在梁國粵來西聖孟浮
空兮倏忽千里錫穿石兮汪洋三井寺以之建徒以之
盛間有高士卜居盡性無修而修無證而證非分別以
為智不起滅而為定有蒲有葛足以備於歲服有芋有
蕨足以充乎晨甌名不及兮冗無塵纓利不在兮喧無
俗乘子居之安兮吾以子慶子出之久兮吾以子病歸

歟歸歟子其吾聽

圓同庵銘

圓同庵前睦州江令尹家園元豐八年冬錢塘淨慈本
禪師爲題其名又請余銘云

南宮令尹結庵桐廬泯絕一致森羅萬殊芥納須彌像
入明珠牕壁戶牖几杖屏孟動靜語默夕寢朝鋪可卷
則卷可舒則舒孰得而親孰得而疏其小無欠其大無
餘強爲之名圓同太虛

圓寂庵銘

萬化一源萬念一息法無不圓念無不寂強名而名車
塵馬迹是庵何如風清月白

休老堂銘

妙高峯頂不住正處毗耶離城別開一路鐵鉢銅瓶葛
巾革屨付者不取取者不付谷有歸雲木有凝露師子
頻伸象王回顧門外老胡一葦橫渡

愚齋銘

嘉祐四年秋八月大理評事孫琪建愚齋於山陽官廩
之東郡學教授試秘書省校書郎楊傑為之銘曰

自賢其愚小人之徒賢而自愚君子之儒齋乎齋乎君
子所居

清白堂銘

清不足恃白不足矜爾恃爾矜人其爾憎衆濁獨清屈
原所以損其身知白守黑老氏所以全其真清哉白哉
難乎其人能於是乎其與道鄰



無為集卷十

欽定四庫全書

無為集卷十一

宋 楊傑 撰

表啓

潤州到任謝皇帝表

久官省寺無補朝廷乞守方州願伸微效拜伏新命得
經歲以待期歸省故園實均恩於賜告慰見民吏恭布
教條中謝伏念臣少起農耕長從科舉策名清世垂三
十年備員太常連六七任在先帝一朝禮樂嘗玷討論

遇陛下千載風雲屢更任使以至陪賓講道入部為郎
既逃辱命之譏仍免瘝官之責遽形外請蒙賜中俞此
蓋皇帝陛下洪覆無私靡遺一物大明繼照廣被萬方
績至治於唐虞不忘勤德保成功於文武克念宜人致
此懦愚亦膺委寄臣敢不下求民瘼上體天心宣化承
流冀仁恩之浹洽惟良共理思訓勅之丁寧誓罄涓埃
仰酬造化

潤州到任謝太皇太后表

乞守方州初虞潛冒豈圖睿旨曲賜允俞已見耆年仰

宣聖澤

中謝

伏念臣生本寒士出逢盛時強起應書累

嘗隨賦自忝一第歷奉四朝惟知直道以事君詎肯阿
權而進已省寺承乏歲月屢遷犬馬之齒漸衰天地之
恩未報固求補外奚止便私耻將空老於熙辰實願收
功於晚景而况潤稱京鎮爲江左之名藩唐擇守臣揔
浙西之諸郡祿豐地重材薄望輕退省無能拜榮增懼
茲蓋伏遇太皇太后陛下母儀累聖子育羣倫其仁如

天每聽卑而矜恤以慈為寶務從治以生成致此瑣材亦分優寄有民有社敢上負於蒼穹盡孝盡忠誓益堅於素節

兩浙提刑謝皇帝表

守待未久報政無聞叨被聖恩就移指使

中謝

竊以先

王明罰期弼教以化成君子盡心必求生而叅聽遣使諸路自我盛朝獄非無辜人浸餘澤以至完甲兵以禁其寇暴積倉廩以濟其困窮惠民為深領職尤重如臣

蹇拙適用寡能拜命戰兢以榮為懼茲蓋伏遇皇帝陛下道周庶物德被萬方堯舜好仁於變可封之俗成康善繼寢隆幾措之風敢謂渥恩致加微品臣敢不詳其枉直約以重輕仰酬欽恤之誠敬奉丁寧之訓誓捐頂踵圖報乾坤

兩浙提刑謝太皇太后表

出守左符未逾朞月遽聞赴闕之命尋乞外邦致膺持節之華就移本部拜恩視事冒寵踰涯中謝竊以祖宗

以來屢降欽哉之訓典刑所繫審知使者之難江湖尤
重於三吳圉圉與聞於一路俾無冤濫責以澄清茲蓋
伏遇太皇太后陛下坤順含光巽重申命媯天密補黿
安立極之功漢網益寬魚泳吞舟之樂臣敢不敬遵中
典上體至懷刑期無刑祈報大生之德訟使無訟助成
丕變之風

謝修南朝正史及賜筆墨表

代王相公

叨被寵休伏深戰懼

中謝

臣聞堯舜盛德書首載於典

謨文武成功政備存於方冊信莫如史才難其人直筆
所傳歷代攸責惟二聖之言動著百王之範模賢能進
而任本朝廷禮樂興而度越今古賞有功而善者勸罰
當罪而惡者懲區宇攸寧人物富庶將紀隆平之治用
詔無窮必資該洽之才仰膺茂選宜宜寡陋獲玷討論
荷給札之殊榮徒懷鉛而增悵

禮部賀冬至上皇帝表

伏以七日陽生氣肇萌於子位八龍樂奏音已協於黃

鍾君德寢昌人心胥慶

中賀

恭惟皇帝陛下對時化育

凝命穆清適當景至之辰擁集朋來之祐推策迎日履
長用保於無疆理物承天行健永期於不息臣某等幸
逢令序獲遇熙朝同傾百辟之心上獻萬年之壽

禮部賀冬至上太皇太后表

伏以御察璿璣二曜應乎合璧審觀玉律一陽動而飛
灰雲物效祥鐘杵協樂驪騰華夏福集邦家

中賀

伏惟

太皇太后母儀三朝子育羣品佑神孫而降慶扶寶運

於無疆政必身先順布陰陽之教神潛德本默參天地之心推周曆以開端望堯門而獻壽

禮部謝春衣表

伏蒙聖慈賜臣等春衣者竊以天道下濟常覆被於羣生春服既成首分頒於庶位

中謝

恭惟皇帝陛下順時

布政愛物推誠寵賚所以勸功寒燠與之同體爰自造庭之士咸均在筭之華臣某等就列垂紳蒙恩賜帛無補經綸之業稱服其難退思機杼之勤飾身益愧誓堅

大節仰報至仁

禮部謝冬衣表

萬乘御裘方戒祁寒之備羣臣受服幸無終歲之憂
伏知榮曳婁增膏中謝恭惟皇帝陛下誕敷醲化廣庇
含靈齊七政以觀方叙四時而成信凡有加綿之煥軫
及外庭士均挾纊之溫敢忘盛德臣等拜恩華繁省已
愧兢誓極捐軀庶將報國天地至大曲全生育之功松
栢後凋願固始終之節

白溝謝御筵奏狀

將命乘軺講隣懽而惟舊及疆授館蒙郊勞之至優豐
腆肴觴溥霑皂隸荷惠慈之加厚在誠意以深銘

新城謝撫問表

候人在道方伸入境之儀使者傳言遽拜問行之惠中
謝竊以肅將國命敦結鄰歡屬寒律之載嚴荷溫辭之
曲諭仰懷恩眷第極感銘

中京謝皮褐表

候屆祁寒恩均盛服恭承存撫滋集欽銘中謝竊以誕
節修儀輶車將命善言曲諭已均挾纊之溫厚意所加
仍拜授衣之寵寘懷無斁叙感奚殫

謝館宴奏狀

弭節修途柅車華館重沐示慈之貺益銜將意之隆仰
荷眷私第銘衷悃

謝簽賜酒食奏狀

征軒爰止旅次甫寧薦紆肴醕之霑仍厚饗殮之品永

惟刻荷莫究敷陳

謝王餽奏狀

輅車將命夙致於鄰
懽多物在庭特豐於賓
餽仰祇恩禮深激悃悰

謝射弓御筵奏狀

息膠駢而就館夙被眷存
講燕射以娛賓繼叨恩貺
矧乏和容之善徒增拜賜之勤

謝餞送御筵奏狀

輅軒修好方成命以言還祖席優賓復寵行而垂眷感
銘斯切敷叙奚殫

回燕京留守三幅書

恭持信幣甫屆陪都方脩汗竹之儀特辱榮函之貺竦
欽謙揖徒切感銘

回中京留守赴筵書

修慶誕辰假途畿壤方駐巾車之役遽申酌醴之歡叙
荷意勤永藏衷素

回諸州召赴筵書

肅將信幣方祝輶車敢圖主禮之勤特辱賓筵之召悚
藏彌切敷述奚殫

回日謝中京留守召赴筵書

講睦寶隣還經樂土特辱賤函之貺仍煩燕豆之陳重
荷眷私倍增感悚

謝杭州蒲左丞啓

皓首為郎愧無功而報國朱方守土遽有請以蒙恩涓

日莅官依仁為幸恭以判府資政左承學深原本識究
幾微四海元龜三朝舊德忠以許國人無間言出鎮東
南均休中外棠陰方茂斯民惟恐於公歸槐位久虛品
物願依於神化某荷知有素託庇云初支郡所拘不得
親承於教令輿人同欲其將再入於陶鈞

謝蒲左丞薦啓

伏蒙封章誤有論薦者竊以朝廷選士言取信於大臣
君子愛人才不遺於片善稱揚躡等感仰悸衷伏念某

賦性甚愚適時無術雖預聞於禮樂曾何補於邦家唯
知固守於舊章詎敢曲從於異論自慙寡陋公則譽其
該通人笑闊疎公則許其剛正昔依造化垂庇已深今
託部封辱知尤重茲蓋安撫判府左丞資政存誠仁厚
為力寒微弗求備於一夫推博愛於多士經營大厦國
工無可棄之材旋幹洪鈞真宰無不陶之器荷恩特達
鏤骨深銘期勉力於後圖庶不辜於先鑒

交代啓

叨被聖恩獲承府政夙敦事契益并悃悰交代某官臺
閣元英朝廷碩哲久淹大用屢易名區方此召還佇膺
顯拜顧蒙成之甚幸愧代斲以非工賴有餘風得為來
範聯登桂籍已均兄弟之親交受竹符愈重子孫之好
披瞻在邇跂望尤深

賀無為知郡啓

伏審涓辰已諧視印恭惟慶慰某官世傳忠義天稟賢
明分宵旰之憂惟良共理為生靈之福易地皆然江民

方切於去思須郡久歌於來暮五月而報即聽政成一
節以趨佇聞君召某竊嚮風有日拜德無階顧惟父母
之邦幸陶雅化重計廟堂之器難久外藩伏乞上為朝
廷精調寢膳

回賀王敏甫學士館職啓

竊審光被寵恩進膺華秩自聞成命彌切忭心伏以圖
錄秘藏上帝名之冊府賢能叢聚前古謂之蓬山豈徒
收校籍之勤蓋所重育材之地文章翰墨得士為多輔

弼公卿由此其選時髦顯擢輿論僉歸恭惟判院學士
國器宏深天資茂粹綵衣就養業詩禮以趨庭青雲致
身角英雄而入彀衆識高譽名重上知方挺秀於相門
再假途於儒館金匱石室讎千載之遺文鈿軸牙籤傳
一家之舊物經綸有素步武曷量固宜自負以軒昂敢
謂不遺於鄙賤連城至寶過僻陋以暗投萬里亨衢知
扶搖之遠到銘深肺腑留示子孫

賀馮待制知揚州啓

伏審輟班近侍出鎮雄藩凡預庇庥伏增慶抃恭以知
府待制器深廊廟德粹圭璋分注上憂暫從外補溥天
之下措紳推翰墨之師自淮以南籌帷賜生靈之福佇
聞節召入贊鼎司臬幸以不才叨佐屬郡燕雀微羽棲
大厦以在期荆棘凋叢戴卿雲而有日伏乞上為宗社
調護寢興瞻望旌麾下情無任欣躍之至

賀吳司諫館職啓

嚮審光奉寵書榮陞秘館伏惟慶慰某官修誠端本造

道資深擢自賢科任當諫列盡忠補闕增帝衮之文章
執節彈邪聳王朝之繩墨聰明眷注中外樂趨會芸閣
之掄才慶蓬山之得路牙籤鈿軸緝唐室之遺經金馬
石渠踵漢儒之故事豈圖謙德先辱珍函曩屬居憂久
稽馳慶感悚之至併集所懷

賀歐陽樞密啓

嚮審光被制書榮陞樞府伏惟慶慰某聞宥密之職太
平所基賢哲在官生靈受賜豈獨一時之福實為長世

之休恭以樞密侍郎上台元精清廟重器文章道德素
推天下之宗帷幄籌謀默贊聖人之治剴裁幾務協契
輿僉將使朝廷無萬里之憂夷夏服兩階之化三山僊
路昔游翰墨之林九重帝心今注詩書之將安危所繫
中外具瞻永扶丕圖大庇羣品

賀南京留守張端明啓

伏審抗章得請出鎮榮歸於朝廷則地重而寄優在閨
門則意承而色順由聖賢之相遇致忠孝之兩全惟侍

奉親闡燕安里社明珠還浦故都增川媚之輝靈鶴歸
遼舊俗有羽飛之望上方眷求元老虛佇嘉謀行聞節
召之嚴入被鼎司之拜用爲霖雨徧敷潤於邦家勿剪
甘棠永垂陰於桑梓某夙承獎擢即預陶鈞趨覲未前
具瞻尤切伏乞上爲宗社調護寢興

賀東宮待制啓

伏審光被寵書榮遷峻秩伏惟慶慰竊聞職清內閣任
重先朝必擇正人以副輿望恭以某官搢紳繩墨廊廟

棟梁爰自春宮夙隆天眷商山舊德漢皇之羽翼已成
秦府功臣唐代之典章取定即升台席大庇邦氓某屬
在浙江叨乘使傳末由趨慶伏重跂瞻

賀杭州蘇內翰啓

伏審抗章中禁得請名都竊惟慶慰恭以知府內翰識
究幾微學深原本忠義聳本朝之望文章爲多士之宗
四近未陪輿情攸鬱顧東南之會府益茂棠陰采中外
之公言願陞槐位五月而報即俟政成一節以趨竚膺

君召某荷知惟舊瞻德有期跂望旌旄卑情無任欣忭之至

賀熊待制移金陵啓

伏承抗章玉闕得請金陵竊惟慶慰恭以判府鈐轄侍郎待制德重端朝忠純體國未陪四近彌鬱羣情顧六代之名區鄰三吳之舊境假途紅幕欽婉畫之尚存移建碧幢實坐籌之有賴錦繡增榮於榆社封疆密接於棠陰即趨召節之嚴難久偃藩之樂

上茹都官明堂圖書

某聞大禮廢非至聖莫之興大禮興非鉅賢莫之述明
堂之禮其天下之大禮乎明以出政教幽以交神靈根
萌於黃帝唐虞幹枝於夏商周華葉於秦漢魏晉宋齊
梁陳隋唐之間剪伐於五代蘇培於今天下前曰大禮
廢非至聖莫之興者此之謂也然而朝廷林藪臣子億
萬舉知大禮之興鮮能述所興之禮惟閣下既能知之
又能述之作爲詩頌奏露天子若夫造化之工張列三

辰羅布萬物以文飾天地未足狀其功也秋江夜濤春
山曉雷浩浩轟轟霹靂震不絕未足狀其辭氣也孤竹之
管雲和之瑟圓丘六奏感徹太極未足狀其音容也神
仙之庭嶽瀆之藏阜積金玉淵聚珠貝未足狀其富學
也是以聳動旒冕特詔褒寵外藏之太史氏千萬載後
爲世盛事前曰大禮興非鉅賢莫之述者此之謂也某
襟衣塵埃聞見寡隘閣下辭學敢望之乎二者不敢有
望於閣下於閣下之功固不敢有所望也然而心膽壯

銳不甘無述故搜歷代明堂之制於經經不足以及乎
傳傳不足以及於史其文雖得其象莫見迺索文而求
象據所象而爲圖圖成而其篇二十歷代之制敢謂十
得其八九矣其有辭枝義失世所不從則略而不取其
所以不自赧縮遠從山林敢投獻於門下者非徒然也
欲乞閣下政餘賜覽損益差繆以足其心爾閣下不以
寒賤爲卻而從之則異日國家建明堂訪古制某進所
圖無復畏懼矣非獨爲寒賤之光抑亦使當世知閣下


風化之致焉

上金陵知府書

傑無爲人以淮南方伯之召而客於楚聞南使過楚楚
人有問之者曰爾不遠萬里將有獻於朝廷其何物耶
使者曰炎海之濱有獸其神若兕匪兕若麋匪麋一角
載義四蹄履仁行以中矩遊而不羣爲世之瑞命之曰
麟楚人曰角之戴義義不足以尊尊蹄之履仁仁不足
以親親行之中矩不足以爲世法遊之不羣不足以爲絕

倫匪兇匪麇麇兇之鄰瑞之來何所補於吾俗瑞之隱
何所損於吾民世之治亂在乎人孰謂繫於斯麟使者
屈之默然而去有士於此少而窮仁義之原長而得仁
義之道非仁義之行不敢以行非仁義之言不敢以言
不生於窮荒之地而生於中和之域不求知於獷俗而
求知於大賢或遇其知而獻之朝廷則非獨使萬目之
駭其必有補於世而不玷乎大賢之知雖不足以爲天
下之瑞而亦無愧於是麟也願閣下少加意焉伏惟閣

下富文老學天下宗師所黜所譽士林權鑑傑世族寒
賤人所不顧今日之來不敢以諂言支說取瀆大君子
敢以所聞獻於門下以俟進退



無爲集卷十一

欽定四庫全書

集部

無為集卷十二

總校官庶吉士臣朱 銓

校對官中書臣王鍾泰

謄錄監生臣畢所誼

詳校官庶吉士臣何道沖

檢討臣何思鈞覆勘

欽定四庫全書

無爲集卷十二

宋 楊傑 撰

碑誌

故武信軍節度使謚康簡追封循國公神道碑
寶元二年秋七月辛丑宗室金紫光祿大夫檢校禮部
尚書使持節和州諸軍事和州刺史充本州團練使兼
御史大夫上柱國天水郡開國公薨於秦邸之正寢上
聞之震悼車駕臨奠親撫衾斂哀慟久之慰恤諸孤恩

禮加等贈武信軍節度使追封循國公特賜白金三千兩緡錢一百五十萬絹五百疋命使監護及遣內省夫人中貴卹治內外事用度悉出於官太常用一品鹵簿儀衛以送喪物寔於奉先佛祠諸子號慕過哀乞廬其側至某年某月某日葬於某州某縣某原禮也太常議謚以謂公質直重厚志尚敦雅下賢趨善素履安夷和柔之德中外推挹案謚法曰溫良好樂曰康平易不訾曰簡尚書省集官考覆輿論爲允乃謚曰康簡易名之

典兼二法之美也公諱承慶字祐之初名承宗宣祖皇帝之曾孫太師尚書令秦悼王諱某之適長孫護國軍節度使兼中書令高密郡慈惠王諱某之適長子也公天資忠孝才藝超卓器識宏遠信厚愷悌世以賢公子稱之雍熙中隨侍高密王出判濟州淳化二年奉宣補衙內指揮使每入貢至京師太宗必召至禁中詢訪州郡風俗山水應對詳敏莫不稱旨因改今名乃授西頭供奉官時濟州圉圉屢空監郡劉蒙叟敷奏上喜顧左

右曰承慶父子曉事盡心公家因賜金箱玉弓二寶帶以寵之濟州舉人程文應格者多高密王欲盡薦於朝有司以解額難之王曰賢者太平嘉瑞文王以多士寧周薦賢乃諸侯之職於是具奏盡數貢於春官至今濟州薦送之數比旁郡爲優自高密王始也公與有力焉孔子曰聽訟吾猶人也必也使無訟乎書曰野無遺賢傳曰孝子成父之美公父子見之矣真宗皇帝祥符四年扈蹕汾陰改東頭供奉官七年改內殿崇班恭謝天

地禮成加銀青光祿大夫檢校太子賓客兼御史大夫
騎都尉十八年上王皇尊號加金紫光祿大夫改內殿
承制天禧元年合祭天地加天水縣開國男食邑三百
戶二年秋八月立皇子昇王爲皇太子授內園副使三
年南郊加檢校左散騎常侍進封開國子加食邑三百
戶乾興元年二月皇帝御正陽門加食邑三百戶上因
曲宴謂諸宗室曰汝等在先朝所歷事節宜各盡所見
奏聞公曰先朝事節備於政要臣嘗扈從車駕封太山

祀汾陰朝謁陵寢幸亳社巡守澶淵以至大酺可謂盛事皆所親見上曰更記內家甚事無所諱避切欲聞也公曰容臣退而編錄上進旬日具所見聞進呈御札褒稱仍許非時上章公於朝政所補非一而其藁不存於家其慎密如此傳曰古者造辟而言詭辭而出公之謂也車駕幸後苑賞花釣魚翌日宗室入謝上曰卿等賞釣樂乎衆曰甚樂公獨曰臣一憂一樂左右皆愕然失色上曰大王何所憂曰臣昨日伏見御幄臨淵侍從數

百人側立危欄之上臣不敢不憂既而龍輿迴轅賞花宴集上下同驩詠歌太平時當豐稔和氣充塞臣不得不樂上顧近戚曰大王愛我如此卿等可學即命取白羅扇御飛白書承慶祐之四字以賜焉夫危樓船以忠諫漢史稱之寵華袞以褒字魯史載之公有臨淵之憂帝有書扇之賜忠以愛君褒以勸善君臣之道可謂盡矣它日宣射上曰先朝多以卿爲神射今日期必中鵠公曰臣實無能偶或有中公拜命發箭雖不出正然皆

不敢近鵠上知公之謙抑乃索御箭連中鵠是時御雙
箭處中央公雙箭在下正上下相向端直如繩墨瞻者
莫不歎仰帝甚悅賜對衣金帶鞍轡馬各二詔書褒異
之詩云終日射侯不出正兮易云勞謙君子有終吉
公得之矣仁宗皇帝即位授內藏庫使加輕車都尉封
天水郡開國侯食邑三百戶天聖二年恭謝天地加上
輕車都尉五年十一月南郊加護軍食邑三百戶七年
九月朝廷敘昭武之裔優推寵命以公乃宣祖皇帝

之曾孫秦王之適長孫高密郡王之適長子故特持節
蔣州諸軍事蔣州刺史八年南郊加上護軍進封開國
公食邑三百戶明道元年改宮苑使檢校禮部尚書加
柱國二年三月東郊籍田加上柱國食實封一百戶是
歲特授懷州刺史景祐元年公以足疾賜告調治二年
南郊遷和州團練使加食邑五百戶寶元元年南郊加
食邑食實封二百戶公養疾六載聖睠益隆既宣太醫
朝夕診療又時遣內夫人至第撫問非常禮也章獻明

肅皇太后臨朝時以公名下一字犯彭城郡王父名欲令改易遣近侍諭之不從一日召於簾前宣問公曰彭城王諱天下所共諱也臣不敢不諱彭城王父諱非天下所共諱也臣不敢獨諱且臣名先朝所賜安敢私易以諂上識者義之公生平博覽墳典翰墨精妙以至樂律丹術仙錄莫不洞究尤善屬文嘗注易二十卷極天人性命之理天子覽而嘉歎賜以金幣又著家訓三卷行於世國朝以來宗室著述自公始也因真宗遣豫公

刺血書佛經以進高密王寢疾不脫冠帶而養上聞之遣內人撫問厚賜以旌過人之行及扶護先王喪往葬汝州會天旱井涸公夜致禱明日乃水泉涌出賜詔稱其誠孝之應經曰事親孝故忠可移於君孝悌之至通於神明於公見之矣公享年三十有九夫人涇陽郡君乃中書令和凝之孫也繼室永嘉郡君虞氏皆賢懿有輔佐君子之道子六人曰克悟右班殿直早世曰克繼贈定武軍節度使開府儀同三司建國公曰克絢贈

青州觀察使曰克孝今任越州管內觀察使曰克肖贈
右監門衛大將軍曰克顧贈昭化軍節度使女十人封
號不同各歸顯族一早世一爲比丘尼孫幾人曾孫幾
人任某官公教子不以爵祿爲重而重乎忠孝不以貨
財爲傳而傳以經術是以太宗朝諸王出鎮藩郡以公
父子爲才能真宗訪政事公獻忠言爲多仁宗試文翰
詔稱公子克孝秀出本支英宗立宗學教育親族克孝
首爲二宗師儒稱薦而復中上科神宗朝克孝著孝經

傳上進賜詔稱諭熙寧以來詔試宗室經術公孫叔敖
叔彖叔某叔某相繼登第元豐講行祀典擇宗子之无
過尤者躬執事於明堂宗廟是時循國子孫與祭者爲
最多議者以爲無是父則無是子無是祖則無是孫子
觀循國康簡公家訓三篇上篇述祖考昭穆之序陳忠
孝禮義之端集古人法語以爲家世之傳中篇篤勵學
問慎修言行重道義而輕富貴下篇言所慎在乎九思
正心以正身正身以正家仁而尊賢恕以及物具善不

善之積明德不德之效於今子孫不忘其訓然後知義
方之教澤流之遠何時而有窮已哉葬後四十年公子
欲以公之善美昭示來世乃具行實請文以立碑於隧
道銘曰

於戲循國宗室之英忠孝仁厚愷悌信誠博學多能兼
典典經左右先王政肅刑清進賢報國邦乂以寧錫以
寶帶父子寵榮諫章慎密聖主從繩勞謙終吉射不出
正天旱井洄葬親汝城精禱泉湧感於神明天子聞之

詔褒以旌曰康曰簡懿哉易名治家訓言載之簡編貽
於後昆忠孝之源公子公孫世其稱賢寵祿令聞傳無
窮年

故右諫議大夫贈工部侍郎沈公神道碑

沈氏之先出於周文王之子聃季食采於沈因而命氏
漢光祿勳戎徙居會稽之烏程後改烏程爲吳興郡故
沈氏以吳興爲望由漢以來世爲右族宋有慶之梁有
休文至唐潤州司兵參軍爰生愉爲懷州都團練判官

愉生僕爲同州馮翊尉僕生師舉爲太常協律郎師舉
生籍爲衢州常山令諱籍即公之高祖考越州剡縣丞
諱德饒公曾祖考也海州朐山令諱仁諒公祖考也贈
工部尚書諱平公烈考也太夫人胡氏封安定郡太君
自朐山令徙居歷陽今爲歷陽人源流深遠慶德相承
篤生良臣器識宏博公諱立字立之少孤力學事母至
孝鞠育諸弟率以懿行鄉閭耆艾推以爲法文詞敏瞻
場屋有時名天聖中登進士第歷任桐城尉畿縣主簿

知績溪洪雅二縣通判壽州益州知池州杭州越州江
寧府宣州滄州入爲三司戶部鹽鐵判官判都水監知
審官西院出爲淮南轉運副使兩浙京西河北都轉運
使充江淮兩浙荆湖六路都大制置發運使提舉商胡
掃提舉崇禧觀以老焉由大理寺丞殿中丞太常博士
厯屯田都官職方三員外郎兵部郎中太常少卿集賢
殿修撰右諫議大夫贈工部侍郎公自初仕已能夙夜
勤職廉義自持孜孜民事以報國家故所至郡縣爲部

使者皆以才稱公尉桐城盜不入境主畿內簿吏不敢欺治小邑皆興學舍在商胡采撫大河事迹古今利病曰河防通議世之治河者取以爲據嘗遇蘇湖大水民多艱食公爲發倉廩出餘財選擇部吏分主賑貸時諸縣有率大姓出粟爲助者公曰官廩充牣烏用擾民悉還給之若積粟之家能自貸借下戶者候其豐歲官爲理償民以爲便存活甚衆初領朔方漕陞辭曰英宗皇帝曰知卿用心公家故召卿經畫邊事慎勿張皇公遍

歷邊郡經度處置人不以爲疑蓋能承上意也公總外
計舊號冗劇施設皆有條理於是綱吏絕僥倖之望疲
兵無凍餒之苦金帛豐羨倉廩充溢天子聞而嘉之因
奏計上從容慰諭云知卿素有才力更宜爲朕用心及
存問家屬諸屬子次第續遣中使賜中金二百兩以優
其勞鎮金陵日上曰以卿清慎公懃故以重地委卿問
所藏書令進所編名山都水記三百卷并家藏書目乃
賜詔書敦獎公爲北朝正旦國信使是歲契丹行冊禮

遣僮介曰能同北朝百官之服則入見不爾當叙班門
外公正色曰遠銜君命以通兩國之好安可門外見耶
項者迂北使到闕會本朝元會之禮亦未嘗命北使易
衣冠常禮不可遽易敵人無以答遂以常服入焉使還
賜金紫旌其不辱命也公嘗撰茶法易覽具述茶之利
害於今著以爲令熙寧二年當轉對力言邪正治亂之
道語甚切直識者知其所存公事三朝白首一節生平
樂經史手不釋卷自奉甚約其稍廩之餘皆供紙札之

費故藏書埒於內府累降中旨就其第傳錄以補官書之闕自元獻晏公而下卿士大夫有歌詩序記百餘篇以美其嘉尚既退歸歷陽嘗曰吾起家寒素仕宦至兩省藏書三萬卷以遺子孫年餘七十而支體康寧是無一不如意也唯日與賓朋詩酒爲樂所著名山都水記茶法易覽河防通議鹽筴摠類賢牧傳稽正辨訛香譜錦譜洎文集共四百卷公治家有法度教子有義方故內外雍肅諸子篤學所至有能聲皆其善教之致也娶

夫人吳氏封濮陽郡君繼娶夫人董氏封仁壽郡君男
六人長安國次安民早卒次安道次安上次安節次安
禮女四人長適進士朱延之次適宣州旌德縣尉曲師
德次適秘書丞裴維甫次適濠州司法丁源並早卒孫
男十四人慶孫壽孫孝孫並試將作監主簿餘尚幼孫
女三人公既薨樞密直學士錢公爲銘以納於壙中其
後鄉人耆舊懷公之德過公墓下則肅然致敬其孤請
予文以書於碑其銘曰

沈氏之源濬於吳興會稽東陽令聞繼承逮於朐山政
肅典刑德積慶餘我公以生起家文儒策科帝廷筮仕
旬畿夙夜靡寧宰牧觀風若權在衡進秩侍從始終不
傾會計外內轉輸富盈孝友於家接物信誠利在邦國
愛均編氓典領都水濬治有經民乃莫居以耨以耕審
官進賢公哉黜陟奉幣出疆煜煜旌旌華服不易憲度
是憑不辱君命正色北廷書載史官炳然丹青功成願
歸請符金陵天子曰嘻詔其屢登昌言啓沃袞章其榮

惠浹政行鎮移宣城囊封乞身掛冠林垞天子念勞嗟
其頽齡俾奉琳宮燕閒紫清歸老歷陽錦繡耀榮稚耆
驩呼豆觴出迎公還舊廬樂康且寧書三萬卷充屋架
楹以示子孫不傳金籙壽乎有窮不朽者名民懷其德
烹牲薦馨道左豐碑信辭是銘

故通議大夫慎公墓誌銘

公諱暉字仲素為吳越著姓後居三衢曾祖諱知禮工
部侍郎贈左僕射祖諱從吉給事中贈工部尚書父諱

鈞大理寺丞贈尚書屯田員外郎尚書娶錢氏忠懿王之女公其長子也初命試秘書省校書郎遷國子監主簿太常寺奉禮郎詣闕上書賜五品服歷衛尉光祿大理殿中丞國子博士入省為庫部水部司門員外郎遷三部郎中知賓州通判邵州擢知楚州海州以嘉祐四年夏四月戊子終於山陽享年六十有三至七年秋八月歸葬於開封府開封縣蘇封之先塋夫人馮氏先公而終銘以祔焉公初守賓賓素無兵備交趾蠻僚數百

人暴至城下城中擾攘計無所出公曰賊勢方銳守與戰皆不可因設疑兵被甲持滿傳呼開城門金鼓大作賊望風遁去使者上章稱之賜金紫邵有谿洞酋首龔行詳者恃險恣暴前後吏莫能禁公通守是郡命捕以戮內外畏服公廉正自持不妄喜怒其貌甚溫臨事毅然有不可犯之色守山陽以母喪去官富人以重幣爲賄者公曰吾家以清白相傳急持去無汙我仕宦四十年及終无負郭之田環堵之室以遺其子孫人以爲

難樞密田公況內相王公洙知公甚深以爲其才可備
臺省力言於朝其後名臣交章薦舉自二公始也子男
三人宗傑見任朝奉大夫才識公廉有家世之風自升
朝累贈公至通議大夫宗道宗誨有學行皆早世女子
四人皆出適孫璵太廟齋郎修潔有文早世大夫以銘
見託銘曰

慎氏之源發東陽三衢分秀派益長祖禰顯仕煒有光
通議入省為名郎應機破賊保土疆屏惡扶善稱循良

傳家清白著義方子孫承繼百世昌

故通直郎簽書商州軍事判官廳公事謝君墓

誌銘

君諱季康字和卿其先河朔人世力田高祖諱皐始以
儒學自立晉開運中明經中第至周任瀛州錄事參軍
贈國子博士曾祖諱成之皇朝任屯田員外郎贈主客
郎中祖諱師顏都官員外郎贈吏部尚書父諱曠朝議
大夫三世皆進士及第自主客游宦京師寓居潁昌之

陽翟後為陽翟人宋元憲景文文章學術為天下宗師
女弟臨洺君博學能文賢而有識君之母也知其子可
以託門戶臨終以屬舅氏元憲元憲亦素愛君孝友介
潔每謂人曰真吾甥也及在政府奏授秘書省正字非
所好也與其兄公儀熙序益勤於學偕有聞於時久之
調徐州司戶參軍海州司法參軍君為掾常以法自持
未嘗少屈於權貴聞者危之而志不可奪用薦者移胸
山令丁繼母陳夫人憂執喪盡禮服除授西平令通山

令改大理丞監大名府經城酒稅會官制行遷通直郎
簽書商州判官廳公事時朝議高年君願解官就養朝
議固止之君不忍去膝下遲遲其行宛丘太守周草謂
君曰尊君年雖高而康強過人君家貧族衆當勉力從
仕以承親意安可衣食於親以就養乎君不得已而之
官及親有疾即解職歸謁未報聞訃至僚友知君之貧
有以資其行者君力拒不受奔喪哭不絕聲水漿不入
口者累日既克葬後三日而卒即元豐六年十一月二

十三日也享年五十有七君幼而好學弱不好弄行已清直事親孝恭朋友尚信蒞官守正不爲勢屈命雖數奇未嘗諂以事上家雖甚窶未嘗躁而有求故所至有令聞朝廷大臣如太師潞國文公翰林侍讀學士劉公樞密直學士陳公皆深知君之所存前一夕其弟文瓘夢君綵服簪紳曳履袖文書以告之曰予平昔之事汝其爲我著之逮旦君逝矣娶劉氏屯田員外郎異之女有子五人長曰收中進士甲科河南府推官次早天次

敬次攷次敷皆力學遵義方之訓女二人長適渭州華
亭縣丞劉逢明次適進士方增孫男一人以元祐八年
四月二十四日卜葬於汝州郟城縣安良原先塋之次
禮也吾友太中大夫致仕宋盈祖乃能道君所存求予
爲銘銘曰

行過乎恭喪過乎哀觀而知仁斯賢人哉

無爲集卷十二